

唐書卷八十

宋端明殿學士宋祁撰

列傳第五

太宗諸子

太宗十四子文德皇后生承乾又生第四子泰高宗皇帝後宮生寬楊妃生恪又生第六子愔陰妃生祐王氏生暉燕妃生貞又生第十一子囂韋妃生慎後宮生簡楊妃生福楊氏生明

常山愍王承乾字高明生承乾殿卽以命之武德三年始王常山郡與長沙宜都二王同封俄徙中山太宗卽

位立爲皇太子甫八歲特敏惠帝愛之在諒闇使裁決庶政有大體後每行幸則令監國及長好聲色慢游然懼帝祕其迹臨朝言諄諄必忠孝退乃與羣不逞狎慢左右或進諫危坐斂容痛自咎飾非辯給諫者拜答不暇故人人以爲賢而莫之察後過惡寔聞宮臣若孔穎達令狐德棻于志寧張玄素趙弘智王仁表崔知機等皆天下選每規爭承乾帝必厚賜金帛欲以厲其心承乾傲不悛往往遣人陰圖害之時魏王泰有美名帝愛重而承乾病足不良行且懼廢與泰交惡泰亦謀奪長各樹黨東宮有俳兒善姿首承乾嬖愛帝聞震怒收兒

殺之坐死者數人承乾意爲泰告望甚內念兒不已築
室圖其象贈官樹碑爲起冢苑中朝夕祭承乾至其處
裴回涕數行下愈怨懟稱疾不朝累數月又使戶奴數
十百人習音聲學胡人椎髻剪綵爲舞衣尋撞跳劒鼓
鞞聲通晝夜不絕造大銅鑪六熟鼎招亡奴盜取人牛
馬親視烹煆召所幸廝養共食之又好突厥言及所服
選貌類胡者被以羊裘辮髮五人建一落張氈舍造五
狼頭纛分戟爲陣繫幡旗設穹廬自居使諸部斂羊以
烹抽佩刀割肉相啗承乾身作可汗死使衆號哭勢面
奔馬環臨之忽復起曰使我有天下將數萬騎到金城

然後解髮委身思摩當一設顧不快邪左右私相語以爲妖又襍氈爲鎧列丹幟勒部陣與漢王元昌分統大呼擊刺爲樂不用命者披樹扶之或至死輕者輒腐之嘗曰我作天子當肆吾欲有諫者我殺之殺五百人豈不定又召壯士左衛副率封師進刺客張師政紇干承基等謀殺魏王泰不克遂與元昌侯君集李安儼趙節杜荷鑱臂血啗之謀以兵入西宮貞觀十七年齊王祐反齊州承乾謂承基等我宮西牆去大內正可二十步棘耳豈與齊州等會承基連齊王事繫獄當死卽上變帝詔長孫無忌房玄齡蕭瑀李勣孫伏伽岑文本馬周

褚遂良雜治廢爲庶人徙黔州十九年死帝爲廢朝葬以國公禮子象爲懷州別駕厥鄂州別駕開元中象子適之爲宰相贈還承乾始王象越州都督郇國公楚王寬武德三年出後楚哀王蚤薨貞觀初追封

鬱林王恪始王長沙俄進封漢貞觀二年徙蜀與越燕二王同封不之國久乃爲齊州都督帝謂左右曰吾於恪豈不欲常見之但令早有定分使外作藩屏吾百歲後庶兄弟無危亡憂十年改王吳與魏齊蜀蔣越紀六王同徙封授安州都督帝賜書曰汝惟茂親勉思所以藩王室以義制事以禮制心外之爲君臣內之爲父子

今當去膝下不遺汝珍而遺汝以言其念之哉坐與乳
媼子博簏罷都督削封戶三百高宗卽位拜司空梁州
都督恪善騎射有文武才其母隋煬帝女地親望高中
外所向帝初以晉王爲太子又欲立恪長孫無忌固爭
帝曰公豈以非己甥邪且兒英果類我若保護舅氏未
可知無忌曰晉王仁厚守文之良主且舉棊不定則敗
况儲位乎帝乃止故無忌常惡之永徽中房遺愛謀反
因遂誅恪以絕天下望臨刑呼曰社稷有靈無忌且族
滅四子仁瑋琨境並流嶺表顯慶五年追王鬱林爲立
廟以河間王孝恭孫榮爲鬱林縣侯以嗣神龍初贈司

空備禮改葬光宅中仁遇赦還適會榮以罪斥故得襲
鬱林縣男歷岳州別駕爵郡公嘗使江左州人遺以金
拒不內武后遣使者勞曰兒吾家千里駒更名千里自
天授後宗室賢者多株翦唯千里詭躁不情數進符瑞
諸異物得免中宗反正改王成紀未幾進王成節愍太
子誅武三思千里與其子天水王禧率數十人斬右延
明門以入太子敗誅死籍其家改氏蝮睿宗立詔還氏
及官爵瑋蚤卒中宗追封朗陵王子紘出繼蜀王愔開
元中以傍繼國改封廣漢郡王遷太僕卿同正員薨
琨武后時歷六州刺史皆有名聖歷中爲嶺南招慰使

安輯反獠甚得其宜卒贈司衛卿神龍初贈張掖郡王
開元中以子禕貴追封吳王

禕少有志尚事繼母謹撫異母弟祇以友稱當襲封固
讓祇中宗嘉其意特封嗣江王以繼囂後開元時亦以
傍繼徙信安郡王累爲州刺史治嚴辨遷禮部尚書朔
方節度使初吐蕃據石堡城數盜塞詔禕與河西隴右
議攻取旣到屯諏曰進師或謂城險賊所愛必固守今
兵深入有不如不捷吾軍必犇不如持重伺賊勢禕曰人
臣之節豈憚險不進乎必眾寡不敵者吾以死繼之於
是分兵迓賊路督諸將倍道進遂拔之自是河隴諸軍

游奕拓地至千里玄宗喜更號其城曰振武軍契丹牙
官可突干叛詔拜忠王爲河北道行軍元帥討之敕禕
以副王不行故禕率裴耀卿諸將分道出范陽北擊二
蕃破之禽酋長以還餘部竄伏加開府儀同三司領關
內支度營田採訪處置使授二子官禕功多執政害之
賞不讐爲當時所恨久之擢兵部尚書爲朔方節度大
使坐事下除衢州刺史歷滑懷二州天寶初以太子少
師致仕明年遷太師未拜薨禕治家嚴教子有法度故
峘嶧峴皆顯

峘性質厚歷宦有美名以王孫封趙國公楊國忠亂政

悉斥不附己者。峘由考功郎中拜睢陽太守，以清簡爲二千石最。方入計而玄宗入蜀，卽走行在，除武部侍郎兼御史大夫，俄拜蜀郡太守、劔南節度採訪使。郭千仞反，與陳玄禮共討平之。上皇還京，遷戶部尚書，改越國。乾元元年，持節都統江淮節度宣慰觀察使、都統之號。自峘始。明年，宋州刺史劉展有異志，詔拜展爲淮南節度使。密詔峘與揚州長史鄧景山圖之。時展強扈，旣受詔，卽悉兵度淮。峘景山拒之，戰壽春，敗績。峘走丹陽，詔貶袁州司馬。卒于官，贈揚州大都督、弟峴別傳。祇封嗣吳王，出爲東平太守。安祿山反，河南陳留、滎陽

靈昌相繼陷祗募兵拒賊立宗壯之累遷陳留太守持
節河南道節度採訪使歷太僕宗正卿代宗大歷時祗
旣宗室老以太子賓客爲集賢院待制是時勲望大臣
無職事者皆得待詔于院給飧錢署舍以厚其禮自左
僕射裴冕等十三人爲之子巖以蔭補五品官祗薨兄
岵得罪乃以巖嗣王累至宗正卿檢校刑部尚書薨贈
太子少保性介直面刺人短歷官清白居室不能庇風
雨收恤甥姪慈愛過人家無留儲公卿合賻乃克葬境
神龍初封歸政郡王歷宗正卿坐千里事貶南州司馬
濮恭王泰字惠褒始王宜都徙封衛繼懷王後又徙封

越爲揚州大都督再遷雍州牧左武侯大將軍改王魏
帝以泰好士善屬文詔卽府置文學館得自引學士又
以泰大腰腹聽乘小輿至朝司馬蘇勛勸泰延賓客著
書如古賢王泰乃奏撰括地志於是引著作郎蕭德言
祕書郎顧胤記室參軍蔣亞卿功曹參軍謝偃等撰次
衛尉供帳光祿給食士有文學者多與而貴游子弟更
相因藉門若市然泰悟其過欲速成乃分道計州繙緝
疏錄凡五百五十篇歷四朞成詔藏祕閣所賜萬段後
帝幸泰延康坊第曲赦長安死罪免坊人一年租府僚
以差賜帛又泰月稟過皇太子遠甚諫議大夫褚遂良

諫曰聖人尊嫡卑庶謂之儲君故用物不會與王共之
庶子不得爲比所以塞嫌萌杜禍源先王法制本諸人
情知有國家者必有嫡庶庶子雖愛不得過嫡子如當
親者疏當尊者卑則私恩害公惑志亂國今魏王稟料
過東宮議者以爲非是昔漢竇太后愛梁王封四十餘
城王築苑三百里治宮室爲複道費財鉅萬出警入蹕
一不得意遂發病死宣帝亦驕淮陽王幾至於敗輔以
退讓之臣乃克免今魏王新出閤且當示以節儉自可
在後月加歲增又宜擇師傅教以謙儉勉以文學就成
德器此所謂聖人之教不肅而成也帝又敕泰入居武

德殿侍中魏徵亦言王爲陛下愛子欲安全之則不當使居嫌疑之地今武德殿在東宮之西昔海陵居之矣論者爲不可雖時與事異人之多言尚或可畏又王之心亦弗遑舍願罷之成王以寵爲懼之美帝悟乃止時皇太子承乾病蹇泰以計傾之乃引駙馬都尉柴令武房遺愛等布腹心而韋挺杜楚客相繼攝府事二人者爲泰要結中朝臣津介賂遺羣臣更附爲朋黨承乾懼陰遣人稱泰府典籤詣立武門上封帝省之書言泰罪帝怒卽遣捕詰不獲旣而太子敗帝陰許立泰岑文本劉洎請遂立泰爲太子長孫無忌固欲立晉王帝以太

原石文有治萬吉復欲從無忌泰微知之因語晉王爾善元昌得無及乎王憂甚帝怪之以故對帝憮然悟會召承乾譴勒承乾曰臣貴爲太子尚何求但爲泰所圖與朝臣謀自安爾無狀之人遂教臣爲不軌事若泰爲太子正使其得計耳帝曰是也有如立泰則副君可詭求而得使泰也立承乾治俱死治也立泰承乾可無它卽幽泰將作監解雍州牧相州都督左武侯大將軍降王東萊因詔自今太子不道藩王窺望者兩棄之著爲令然帝猶謂無忌曰公勸我立雉奴雉奴仁懦得無爲宗社憂奈何雉奴高宗小字泰尋改王順陽居均州之

鄖鄉帝常持泰表語左右曰泰文辭可喜豈非才士我心念泰無已時但爲社稷計遣居外使兩相完也二十一年進王濮高宗卽位詔泰開府置僚屬車服羞膳異等薨鄖鄉年三十五贈太尉雍州牧二子欣徽欣嗣王武后時爲酷吏所陷貶昭州別駕薨子嶠神龍初得嗣王開元中爲國子祭酒以罪貶鄧州別駕薨徽封新安郡王

庶人祐字贊武德八年王宜陽進王楚又王燕已乃封齊領齊州都督貞觀十一年始歸國以明年入朝以疾留京師其舅尚乘直長陰弘智儉人也說祐曰王兄弟